

摘藻堂四庫全書薈要

史部

欽定四庫全書薈要

史部

硃批諭旨卷一百

四十一

詳校官編修臣繆晉

欽定四庫全書薈要卷八千八十

史部

硃批諭旨卷一百四十

硃批王朝恩奏摺



雍正二年正月二十五日大理寺卿職銜調補浙
江布政使臣王朝恩謹

奏為清查浙省藩庫錢糧事竊臣奉廣東督臣楊琳
撫臣年希堯准吏部咨奉

上諭廣東布政使王朝恩著給大理寺卿職銜調補浙

江布政使清楚浙江錢糧等因欽此咨院行司遵照
臣當即恭設香案望

闕叩頭謝

恩并詳廣東督撫兩臣代

題恭謝

天恩在案臣即於雍正元年十一月初九日自廣起程
至今年正月初六日到任准署布政使印務按察
使臣王之麟移送交盤各冊內開應存庫正雜銀

共計六十八萬五千九百四十三兩零臣親詣庫

逐項盤兌止有現銀三十八萬六千五百三十七

兩零計缺銀二十九萬九千四百六兩零當即具

詳督撫請飭清追又據冊報缺少緣由一項滿漢

官兵借支俸餉等銀一十四萬七千三百四十六

兩零一項巡撫李馥提取銀四萬二千一百九兩

零據稱買米補漕一項前司傳澤淵借支銀一十

萬九千九百五十兩零或稱買米補漕或稱融支

扣餉

新兵或稱借給往閩官兵路費或稱捐駝等項墊

之舉當緩

緩為之

不可嚴急

似此有抵之項

何難

用第查缺

少項內旗營借支俸餉

於本年應支銀

補足

稍遲時日

無妨

內可以扣抵即或官兵之內間有事故扣有未足

者臣身在地方未敢諉之已往自當代為補苴不

致公帑懸缺又查巡撫李馥提取之四萬二千一

百餘兩如果買米催令運米入倉亦可抵款如米

有不足應於李馥是問又查前司傅澤淵借支之

一十萬九千九百餘兩除買米融支借給路費應

俟分案著落外其餘不敷據議於雍正元年以前
通省各年應捐俸工解補今傳澤淵雖經病故盤
查保題之巡撫李馥現在以上缺少銀兩雖開報
有抵而庫貯錢糧豈容久懸但臣既已照例詳明
督撫應聽撫臣於交盤限內查追如限內不能盡
數還庫撫臣仍令牽抵彌補臣自當據實奏

聞請

旨定奪斷不敢扶同欺朦辜負

聖恩自蹈不臣之咎。所有臣盤過庫貯存缺銀數理合

具摺奏

聞謹

奏

覽爾此奏甚屬可嘉。勉之。新任巡撫黃叔琳將次到任。俟伊抵杭。爾其盡心協助。將浙省吏治整理一新。方不負朕之信任。委託凡百據實一切無欺。無隱為貴。朕生平取人只一誠字。爾等能以此事。朕則獲福難量也。

同日又

奏雍正元年十月內蒙

皇上加臣卿銜調補浙江布政使清楚藩庫錢糧廣東

撫臣年希堯轉傳勉臣

上諭并蒙

聖恩准臣具摺密奏欽此竊念臣一介庸愚向蒙

聖祖仁皇帝不次超擢報稱無地任粵八載循職謹守庫

藏無缺荷蒙

皇上睿鑒加銜調補臣何人斯際此

寵遇揣分已自不安又蒙

溫旨遙頒勉勵諄切格外

天恩委曲詳盡鏤骨銘心難報

高厚今於初六日到任除盤過庫項錢糧另摺奏

聞外查浙省藩司向收節禮養廉收餉並無平頭每百

止有添針銀二錢以為放餉補折之用臣今照舊

收貯其節禮一項臣現在禁革惟有矢勤矢慎遵

旨敬謹辦理期副

皇上多方勉勵教臣做一好官至意惟是臣知識短淺
浙藩任重必得親叩

天顏面求

聖訓地方事務庶免錯誤但藩司無請引

見之例懇乞

皇上恩施格外允臣所請俾臣得遂犬馬戀

主之心實為萬幸為此具摺請

旨謹

奏

爾等撫藩皆係新任何可擅離職守黃叔琳到來協同辦理數時土俗民情熟諳之後朕方有旨命爾來京陛見也至於地方應行事宜悉已明白面諭黃叔琳矣

同日又

奏臣於雍正二年正月十四日奉巡撫准到吏部咨文一件為嚴行查叅事議得戶部咨稱浙江巡撫

李馥以雍正元年下運額銅八十三萬一千五百九十九觔零應於十月內辦解到部今時屆九月尚未報解將辦銅遲延嘉興府革職知府吳永芳指叅移送吏部議處等因前來查銅觔關係鼓鑄事屬重大銅觔既有如許之多自應分委大員辦理止委知府一員承辦以致遲誤且十月內應解到部時屆九月尚未辦齊顯有侵蝕情弊該撫並不據實題叅止將革職之員以遲延叅送塞責以

致下運銅勛遲誤應行令該撫作速查明侵蝕情
弊並將原委各上司一併題叅可也等因到院行
司臣查訪得雍正元年下運銅勛因腳價銀兩發
不足數以致承辦之官不能依限辦解再如雍正
二年上下兩運之銅巡撫李馥已於上年三月內
領去辦銅銀二十四萬兩尚未委員承辦第恐將
來仍然滋誤事關鼓鑄臣有所聞不敢隱瞞理合
一併奏

聞謹

奏

銅觔一事爾奏明甚是李馥諸凡不妥迥非當日按察使聲名今江國英案內斷難姑容已有旨令其離任命黃叔琳前來矣爾將類此各務竭力秉公料理黃叔琳若有朋比瞻徇處即當密以奏聞至於爾之如何殫心効力朕自有照鑒非虛負臣工之人主也據實二字勉為之

雍正二年八月二十四日湖南巡撫臣王朝恩謹
奏本年七月十四日奉

聖主面諭據兩廣總督孔毓珣奏稱廣東藩庫流抵俸
工爾任內應賠銀四萬兩朕批回伊摺內云王朝恩
不日來京俟問過王朝恩應賠與否等諭臣回奏俸
工原是督撫取去公用與臣無干但臣專司庫項
督撫要用聽從取去即是臣之不是臣情願認賠
蒙

聖明在上不加罪譴允臣認賠臣之幸也安敢遲違今

設措現銀二萬兩專候督臣孔毓珣移文到日即

行起解尚欠銀二萬兩臣向年在廣代商人完過

鹽餉鹽價銀兩可以催追抵補斷不敢在湖南任

內擅取分文有負

皇上生成大德理合先行

奏明伏乞

睿鑒施行謹

奏

如此甚好清廉二字極宜加勉

雍正二年十一月初四日湖南巡撫臣王朝恩謹
奏十月十二日臣家人齎捧到臣奏補廣東俸工摺
子奉有

硃批臣跪讀之下不勝惶悚感泣竊念臣才庸識淺荷
蒙

殊恩特授巡撫重任時切冰兢敢不益勵清操上答

聖明下保身命臣自十月初一日抵任以來贅儀節禮

槩不收受考察官方不敢混竊一人臣蒙

皇上生全大德惟有刻苦自勵不敢計及身家況臣從
前藩司任內除用度之外尚有餘力可以辦公報
效倘將來歲久月深難以支持自當據實陳

奏臣賦性愚拙從不敢曖昧欺心巧詐取錢自甘欺

罔辜負

聖慈臣之實心如此理合

奏明所有奉到

批摺及臣在浙藩任內奉到

批摺一併恭繳謹

奏

覽奏知道了若不交通聲氣趨奉權要一己所需能費
幾何自然易處矣怡親王乃為國惜才之賢王朕所深
信不疑者料無苛索於爾之理爾果一心奉公家門私
事王儘可照管有餘其他怙勢徼利之輩又何必舍己

之身家性命而為之填無厭谿壑耶即目今隆科多年
羹堯亦不能為汝致福降禍且二人曾在朕前奏汝不
堪信任爾須奮勉自勵全朕特用顏面庶不致被人所
笑勉為之假朕恩以為己力喪心無恥者頗不乏人切
勿為其所愚但信此數行硃諭好

同日又

奏臣於本年七月內在京

陛見時奉

皇上面諭湖北臬司蔡起俊官聲何如密訪奏聞臣欽
遵

聖諭到任後即密行訪察未聞蔡起俊做官有要錢不
好之聲名但其為人粗率性情不好是實聞伊起
身進京時督撫催令各屬將蔡起俊名下原定應
得養廉給與湊完前任官庫銀兩臣訪聞如此理
合據實回

奏伏乞

睿鑒謹

奏

知道了蔡起俊乃倚恃隆科多度日之人無足取者

同日又

奏臣在京

陛見時蒙

皇上面諭湖南安仁縣減則一事著問布政使朱綱如
何不行細查即詳巡撫具題欽此欽遵臣到任後即

傳

旨詢問朱綱據朱綱回稱此案係雍正二年二月二十
五日奉前任巡撫魏廷珍批前任藩司鄭任鑰文
書著令另敘簡詳以便具

題隨行衡州府查詳去後朱綱於三月十三日到任
續據府縣詳到理應稟請撫院再行踏勘乃照前
司奉批舊案遽即轉詳請

題是朱綱冒昧疎忽之處求轉

奏懇

皇上寬宥等語理合據情轉

奏覆

旨謹

奏

所奏知道了朱綱行止輿論不一依朕觀之似欲速成者然否據實奏來密之

同日又

奏為欽奉

上諭事案查雍正二年八月十九日欽奉

上諭國家分理庶績務在得人道府州縣等官尤屬要職其有才幹素著廉潔自持者不得以時上聞何以示勸於各省道府同知通判州縣等官內著總督保奏三員巡撫保奏二員布政使按察使各保奏一員將軍提督亦屬本省大員將所知者亦令保奏一員俱各密封保奏不得會同商酌等因欽遵在案臣於

十月初一日到任恭誦

聖諭理應遵

旨保奏二員但臣到任未久湖南地方遼濶通省屬官

賢否尚未周知保奏官員一時未便草率容臣細

加訪察必得深知灼見方敢據實保奏理合先行

奏明伏乞

皇上睿鑒謹

奏

所奏是得人時再行補奏可也

同日又

奏本年七月內臣在京

陞見時蒙

皇上面諭湖南田賦不均百姓未能受益此誠

聖主明見萬里澄清欺隱包賠之至意臣自抵任以來

檢閱卷案併據百姓紛紛陳訴細察其中所以不

均之故蓋自康熙二十八年經湖南巡撫興永朝

題請丈量起至四十五年巡撫趙申喬題請勒限
墾荒陸續報墾陞科之後五十二年巡撫潘宗洛
以湖南荒蕪田地除歷年報墾外尚未墾田五萬
一千五百餘頃實在人力難施請照各省之例免
其勒限具題奉

聖祖仁皇帝遣郎中瓦爾渾會同總督額倫特親身詳悉
查勘前任藩司阿琳慮其滋擾竟令原未墾完之
長沙等四十一州縣俱報全墾足額造冊六年陞

科其實皆係照額攤加從前欺隱者仍復安享如
故而包賠之戶益覺受累頻年構訟無休錢糧拖
欠官民交困五十九年期屆陞科民情不服嘵嘵
訴辯前撫王之樞於四十一州縣內摘題長沙等
一十五縣減則徵收以慰輿情今雍正二年前撫
魏廷珍任內又因安仁縣百姓不服據詳題請照
例減則奉

旨令臣遴委賢員履畝確查分析上中下科則造冊現

在遵照間臣復訪聞得十五縣減則一案前撫王之樞以公費為名令前藩司宋致將岳州府知府許玠應領辦銅銀內那去二萬八千餘兩嗣因許守辦銅急需又令各縣將已徵減則銀兩那與許守辦銅以俟捐還收不足數復那長沙府知府張楫辦銅價銀還給許守將未經收完減則之銀抵還張楫究竟未能全補宋致賠銀六十餘兩以完此局而減則公費一項經新司朱綱查揭魏廷珍

題叅湘鄉護撫朱綱題叅益陽善化總督楊宗仁
題叅湘陰併聲明長沙等十一縣自必一例濫派
公費名色請飭一併提質將來研審自然水落石
出但臣既有所聞不敢不先行奏

知道了
聞至於湖南田賦不均非丈量不能明白但恐行之不

善愈增擾累臣凜奉

諭旨現與司道等悉心籌畫容另請

旨遵行合并聲明謹

奏

清丈田畝大事也甚有關係切戒輕舉須爾與楊宗仁
朱綱三人同心合意察明情弊籌畫得宜然後公同奏
請絲毫不容草率朕意且將包賠之戶應減則者查題
其欺隱之田應增額者徐為設法漸次料理方好萬不
可失於急遽

同日又

奏本年九月二十八日臣行次醴陵縣接得布政使

朱綱奉總督楊宗仁轉鈔

皇上諭旨將此條奏二摺交與總督巡撫並轉發湖南
巡撫可將其中應當施行并或有未便施行之處俱
詳悉斟酌回奏併鈔送條陳二摺到臣欽此欽遵今
議得條陳一件為請立苗徭之約束以安邊徼以
靖兇頑事條陳內開楚南民徭雜處如永保郴靖
等處崗數甚多惟以搶奪為事道州永明等處界
連廣西之富川等處粵地苗徭越境為非邊地光

棍勾引生事捉人勒贖請令有苗猺州縣將崗寨
查明照民編甲設立練總寨長如有干犯著落拘
拏生苗兇惡難馴惟防伊等出入杜絕土棍勾通
交界設汛互察文武疎諱照例處分等語臣查苗
猺原有生熟之分熟者耕鑿飲食與齊民不甚相
遠但生性獷野時有搶奪貽害地方究其根源亦
由近崗姦民勾引教唆構釁惟有飭令有司嚴禁
附近居民不許出入崗寨致起禍端違禁查解盡

是

法懲治則苗徭無勾引之人自不敢於生事查歷
來原設有土千百戶在總督衙門給發委牌管轄
亦各有寨長分理似無庸再添練總名色與齊民

甚是

一體編查徒滋紛擾至於生苗生徭散處深巖密
箐之中言語衣食不與民同又以熟苗熟徭為耳
目時出邊界作祟不法之徒亦有串通熟苗熟徭
引線潛入彼地構釁為患者臣檢閱卷案生苗生
徭出入之處現有附近鎮協營汛分防彈壓失事

照例詳參已如條陳所云今再移行文武嚴飭苗
徭雜處州縣實力奉行內地之保甲加謹隘口之
稽防則民自為民生熟苗徭各以類聚不致彼此
勾引內外釀禍邊徼自然寧謐不必專治苗徭而
是當之至
治法即在其中矣謹

奏

條奏之語未免稍過楊宗仁所奏又太輕視爾此論適
中允妥與朕意合嚴飭屬員實力行之可也

同日又

奏竊臣接布政使朱綱奉總督楊宗仁鈔送

皇上諭旨並條陳二摺到臣除請立苗徭之約束一事
另摺議

奏外今議得一件為嚴禁楚習之刁橫以肅紀綱事
條陳內開楚中獷悍成風惡衿土棍動即勒衆逐
官罷市又有甫經摘印乘機打入私衙併有擡聖
賢牌位打架教官不加禁約反串通漁利上司漫

由督撫之縱成如去年九月內安仁縣知縣田仁
被叅摘印有百姓鬩閘縣堂一事臣到任後檢閱
舊案雖田仁所稱搶毀

聖訓銀櫃係屬捏飾而於該令摘印之日鬩聚多人以
此事湯宗仁未經明白奏聞如此據實不隱方是

賒欠舖戶為名勒取署內衣物等項抵還欠帳情

實有之此等刁風臣愚以為由上司不知正身率

覺發笑

屬以安百姓之故亦有上司雖則廉潔或剛愎而

狃於一偏或柔懦而不知振刷之所致也臣蒙我

皇上格外宏恩簡任楚疆固不敢縱官虐民致滋多事
亦不敢任豪強矜棍結黨把持挾制官府有傷

國體臣惟事事仰遵

聖訓潔已奉公寬猛交濟不使官民之勢偏重此風或
可漸息即或一時未能頓改遇有前項不法等事
亦必據理揆情分別究治務期處置得宜無負我
皇上飭吏愛民之至意也謹

奏

果能行與言符朕不為湖南顧慮矣勉為之

雍正三年二月初三日湖南巡撫臣王朝恩謹

奏雍正二年十二月二十八日臣標把總捧到臣代

朱綱陳奏自認安仁縣田畝減則一案疎忽摺子

奉有

硃批臣抵任以來看朱綱身家殷實錢糧謹慎誠可委
信惟操切苛細罔知大體人多怨望至於有無欲
速之處無由窺其衷曲不敢冒昧指陳理合據實

奏覆伏祈

睿鑒謹

奏

知道了觀汝二人似不相合若然於地方民生無益果
汝二人彼此矛盾朕但是朱綱而不是汝不可不知也
朱綱劣處如有真憑實據指明叅奏則可倘懷私不睦
暗相傾軋將來汝必至於虧辱密之

同日又

奏為恭謝

天恩事雍正二年十二月二十八日臣標把總齋捧
皇上頒賜哈密瓜二箇并

皇上批回臣奏刻苦自勵摺子到署臣恭設香案望

闕叩頭謝

恩訖敬啟摺匣跪讀

硃批竊念臣賦質既拙學問又疎自服官以來兢兢自

守介然獨立從不知通聲氣迎權要是以人人皆

以鄙吝目之今蒙

皇上委任封疆重寄又荷推誠指示奚啻家人父子長
跪三復涕淚交垂臣行年將近五旬氣志已定此
心止知有

皇上不知有身家止知報

聖恩不知迎權要第慮知識短淺地方事宜措施難必
一一盡善仰祈

皇上時賜教誨免致隕越庶臣有生之日皆報效之年

矣所有微

臣

感激私衷理合虔申奏

謝伏祈

睿鑒謹

奏

亟當小心勤慎聲色娛戲最能廢事豈膺封疆責任者
所宜且聞爾家口衆多用度甚繁從何而辦撫標營伍
廢弛已久須常加訓練鼓舞兵弁爾非尋常受恩之人
可比若孤負委任壞朕用人之名必重懲以示戒慎之

勉之

同日又

奏為奏

聞事欽惟我

皇上念切民依首重農事凡各省之雨水田禾無時不
上廛

聖心臣自上年十月初一日抵任即檄行通查據各府
州申報自十月以迄十一月天氣晴明田家及時

收穫十二月初五六等日天降瑞雪十七十八等
日得雪一尺有餘本年正月雨澤調勻菜麥俱好
又據布政使朱綱開報目下米價每石八錢四五
分至一兩四五分不等地方相安商民樂業除將
來雨澤及春耕田禾容臣再奏外所有冬雪春雨
及目前米價緣由理合奏

聞以慰

聖懷謹

奏

覽奏雨雪米價情形曷勝欣悅但須一一據實直達不可絲毫粉飾

同日又

奏竊臣標把總齎捧到臣奏湖南田賦不均摺子奉有

硃批臣跪讀之下仰見

皇上至德如天愛民如子謹密商督臣楊宗仁布政使

臣朱綱同心合意漸次料理斷不敢草率輕舉致負

皇上子惠湖南地方之德意也理合

奏覆臣再有陳者據朱綱呈詳湖南自康熙四十六年奉有部文嗣後承認開墾於六年後照下則起科俟納過五年仍照原則徵收至五十三年四十一州縣一所題請全墾部覆雖止云於五十九年照下則起科未曾載有納過五年仍照原則徵收

之語然亦並無永照下則不必復原則之明文其
四十一州縣一所內除長沙等十五縣於五十九
年起科之時因田地依山沙磧實甚業經題明減
則并麻陽等四州縣一所於五十九年已照各本
則起科均無庸復則又安仁縣現遵部文俟勘明
上中下則另報外其湘潭等二十一州縣例屆復
則之年理合呈請題明等因連詳到臣臣 三批該
司確查而該司執定康熙四十六年認墾復則之

例必欲具題復則但該司現詳復則州縣之內尚有瀏陽等縣各以田地瘠薄辦賦維艱詳請永照下則徵收臣若不批令通行查明能復不能復竟以一例復則具題將來復則之後而各州縣仍以田地瘠薄辦賦艱難為請豈不於

國計民生均無裨益輾轉思維不敢一槩坐定復則冒昧率題除據詳具疏題明外理合一併奏

聞統惟

睿鑒謹

奏

爾乃通情之論朱綱亦據理之見具題到日候朕酌定
同日又

奏為恭謝

聖恩事雍正二年十二月初六日准通政司封發臣奏

岳州衛所屬地方被災分數勘明另題一本奉有

皇上嚴旨飭行並將原本發回欽此臣跪讀之下不勝

惶悚隨查此案於上年十月初八日拜疏之後即行復勘明白就於是月二十八日一面題報一面仰體

皇仁行司散賑未敢後時竊念臣賦性愚拙凡關錢糧事件未免過於慎重者恐有草率致涉欺朦是以前案只知確查為急遂失先後之宜誠屬錯謬乃蒙

皇上不即加顯責而復

訓諭周詳將本發回

天地包容不是過也

臣晨夕思維不禁涕零嗣後辦理

庶務惟有恪遵

聖訓倍加謹慎仰答

洪恩於萬一耳為此具摺奏

謝謹

奏

大都為己之念重為國計民生之念輕所以每有此等

錯謬若果秉公執正但知有國而不知有身斷不如此也總之為人臣者能屏盡私腸則無事不辦無往不宜勉之

同日又

奏為欽奉

上諭事雍正二年七月十八日臣在京

陛見時奉

皇上手授諭摺

諭湖廣總督楊宗仁湖南巡撫魏廷珍湖南地方苗徭
雜處必綏理有方乃能移風易俗聞吳三桂竊踞之
時內地居民有義不從逆避入苗徭籍內者久淪殊
俗深為可憫今願歸民籍者宜令地方官聽其改籍
為民又自古治苗徭之法惟以威武未能濡以文教
我

聖祖仁皇帝道化翔洽無遠弗屆熟苗熟徭俱令就試入
學異方丕變但當時嚮學者尚少原議之處未廣今

聞各處苗徭多有讀書求試者宜一體收羅并許應試夫使良民脫於苗徭使苗徭躋於學校此國家安民化俗之要務為大吏者所當留心察訪而並行之爾等並未加意經理是為有負封疆委寄之重著即會同詳議具奏用宏懷遠敷文之化特諭欽此欽遵

臣抵任後遵即一面咨移督學二臣公同詳議一面檄行藩司查議通詳并飭先將內地人民從前有避入苗徭籍內者通行有苗各屬遍示曉諭宣

揚

聖德許赴地方官呈明聽其各歸原籍如或有年久難
於稽查原籍者令地方官酌量安插務使各得其
所以副

皇上矜恤邊民之德意其苗徭嚮學之士現據藩司詳
稱近年以來文風日盛各處苗徭多有讀書求試
者今既蒙

恩旨下頒應請將附近苗徭之州縣酌量於額外議定

取進童生三名准赴州縣應試永為定例等語臣
又移查學臣咨商妥確另行會疏具

題請

旨定奪緣奉

上諭理合會同督臣楊宗仁先具摺覆

旨伏乞

皇上睿鑒謹

奏

知道了料理苗夷事務比內地更宜公正勤慎勤之一
字在爾尤當加勉

雍正三年四月初三日湖南巡撫臣王朝恩謹

奏為恭謝

聖訓瀝陳愚衷仰祈

睿鑒事本年三月二十七日臣家人齎捧

奏摺回署跪讀

御批極當小心勤慎聲色娛戲最能廢事豈膺封疆責

任者所宜且聞爾家口衆多用度甚繁從何而辦撫
標營伍廢弛已久須常加訓練鼓舞兵弁爾非尋常
受恩之人可比若孤負委任壞朕用人之名必重懲
以示戒慎之勉之欽此伏念臣賦性庸愚才疎識薄
荷蒙

皇上加恩教訓不啻家人父子今奉

殊諭諄諄惶愧之下無地自容臣自思從前聲色戲娛
之事自

皇上登極以來早已屏絕上年
聞爾蓄養女優乃廢事壞名之舉故有前論
陛見時曾經奏明況今身為巡撫任大責重豈可復耽

逸樂

聖明遠照萬里自有洞鑒非臣所敢飾詞也臣之家口
身隸旗籍京城究為根本不立產業終歸何所湖南如
此用度在京亦仍此用度的量可使令者留用其餘俱
祖父舊人歷年生聚連親丁約有一百六十餘人
當安插分減餘資以養贍之豈不兩便且係久遠之道
何憚而不為之耶
插只得隨任養活蒙

皇上為臣慮及於此

高厚深恩感激涕零

臣

之愚計祇有痛加節省刻苦自

勵而已至於訓練營伍鼓舞兵弁

臣

到任之初即

示期簡閱

臣

標兩營及長沙協營將弁兵丁俱經

犒賞獎勵迨後按期操演鎗箭不容少懈又見營

中鳥鎗長短不齊選匠打造盡改合式營中之弓

有舊損不堪用者已捐製二百張分發更換兩營

技勇舊無藤牌

臣

捐資專差赴廣置造牌刀於步

兵內挑選演習以壯軍威此皆臣分內當行之事
從前不敢冒瀆

天聽茲蒙

皇上諭及用敢據實直陳仰祈

睿鑒謹

奏

只在實行不在空言勉之

雍正三年六月二十五日湖南巡撫臣王朝恩謹

奏為恭謝

天恩事雍正三年五月十八日臣家人齎捧

皇上批摺到楚併捧

御賜紫金蟾酥各種藥錠一匣臣即郊迎至署恭設香

案望

闕叩頭謝

恩訖竊念臣備員封疆寸長未效乃荷

皇恩疊頒賞賜惶悚靡已今當盛暑之時又蒙

御賜藥錠

聖慈之眷念有加臣心之感激無地且摺內

硃批訓旨與學臣黃鴻中傳述

聖諭無非欲臣有則改之無則加勉全名保身作一好官之

德意臣非木石敢不銘心刻骨奉為

寶訓至如隨任家口現在酌量安插以副

聖懷自今惟有益加砥礪事事悉遵

聖諭無貳無欺以仰報

高深於萬一耳理合繕摺奏

謝伏惟

睿鑒謹

奏

覽奏俱悉切毋效法年羹堯如此禽獸居心行事也

同日又

奏為恭報早禾收成及雨水情形事竊查湖南七府

二州所屬地方早禾收成分數長沙府屬十二州縣內長沙等十屬春夏雨水霑足早禾收成計有十分惟茶陵州湘陰縣春雨愆期收成止有七分衡州府屬十州縣內衡山等八屬甘霖時沛十分收成惟藍山鄧縣二處三春雨少插蒔少遲收成亦止七分永州府屬八州縣自春徂夏雨水應時十分收成寶慶府屬五州縣四月以前雨水微小收成約有六七分不等四月初七日以後連得大

雨四野霑足岳州府屬八州縣內平江等五屬雨水及時收成約有八九分惟已陵安鄉慈利三縣春雨稍遲收成止有七分夏雨霑足常德府屬四縣三春雨水未足收成亦止七分入夏甘霖大沛辰州府屬七州縣春夏雨暘時若十分收成郴州所屬五縣三春雨澤稍少收成亦止有七分四月霖雨時作靖州所屬四縣春夏雨水如期收成約有八九分至於中稻茂盛俱將吐穗揚花晚稻

亦皆秀茂市中米價每石自六錢二三分起至八錢五六分不等軍民和輯苗漢相安理合繕摺

奏報謹

奏

覽收成雨水情形知道了總宜據實直陳毋蹈欺隱之咎

雍正三年九月十三日湖南巡撫臣王朝恩謹

奏竊臣前奏恭謝

天恩一摺奉有

硃批臣跪讀之下伏念臣至愚至拙素無表見蒙

皇上特達之知拔置巡撫

天恩優渥報稱未能夙夜捫心悚惶實甚臣自分居心
行事過於謹畏即竭力黽勉猶恐多所貽誤安敢
效年羹堯之行為自干

國憲也

皇上明同日月臣亦無庸置喙自蒙

簡畀湖南已經一載祇知事事仰遵

聖訓竭盡駘實心辦理不敢違悖致負

殊恩今蒙

皇上教誨諄切理合奏

謝伏惟

睿鑒謹

奏

公勤二字最為切要當銘佩勿忘

同日又

奏為恭報收成分數米糧價值事竊照湖南長沙等
七府二州自七月以來各屬地方雨暘時若今秋
季將終一年收成可以總計而定據布政使朱綱
開報中晚二稻收成合算均有八九分不等鄉城
米價隨時增減皆因米有高下不一現今倉斗每
石自六錢二三分至八錢四五分九錢不等至若
地方素來寧謐今值年歲順成兵民尤為樂業理

合繕摺奏

聞以慰

聖懷謹

奏

覽收成分數深慰朕懷但聞米價仍出一兩之外所奏
為何不符

雍正五年七月初十日盛京戶部侍郎革職留任
署理奉天府府尹印務臣王朝恩謹

奏為奏

聞事臣因失察戶部買米一案荷蒙

聖恩從寬革職留任復奉

旨命臣兼管府尹印務署事以來題請奏銷展限又奏
請

命往候補人員盤查倉糧均邀

俞允得以次第辦理感戴

高深捐糜難報查奉天府屬倉糧多有虧缺臣已將錦

是

縣知縣呂曰宮鐵嶺縣知縣王永祿題叅在案今
候補知縣曹涵盤查得開原縣倉糧內缺少倉豆
七百三十石係前官借出臣查開原縣知縣萬如
濟居官辦事尚在勤慎所缺豆石照部價計值不
滿三百兩況係因人擔累並非該員侵那是以臣
暫緩題叅勒限買補還倉又府尹衙門向有州縣
節規及出口車票飯錢以作官役養廉又有俸工
以辦公事前任府尹循照而行惟蔡珽到任一槩

非自

顧而不顧人乃顧人而不顧事耳

停止未免自顧而不顧人遂致公事難辦臣署事以來看得俸工一項欽奉

特旨禁止捐用臣俱欽遵給發不許捐扣至節規一項亦嚴行禁革惟出口車票一項每年約收銀一千二百餘兩臣雖係署員不敢矯情干譽使後人難以辦事並未革除留為府尹養廉人役飯食紙筆之費臣署理府尹所辦事務理合奏

聞謹

奏

爾非無過之人可比當勉力以蓋前愆況年又未老豈宜因循怠忽於此一任要須秉公持正致身辦理倘有些微欺私不愜朕意處身家性命殊為可惜朕非好為嚴刻總期諸務合於公當耳勉為之慎為之

雍正五年九月十二日盛京戶部侍郎革職留任署理奉天府府尹印務臣王朝恩謹

奏為恭謝

聖訓並綴

硃批原摺事臣前奏辦理府尹衙門事務一摺奉有硃批臣跪讀之下儼如

天顏咫尺伏思

皇上訓諭諄諄正為保全臣之功名與臣身家性命惟其

眷顧之隆是以

訓諭之切臣非木石寧不感愧況正當服官之年敢不

致身竭力但識淺才庸是臣之短習嬾好嬉是臣之病前導

聖訓久已改過茲更當時刻警省不忘諄切之諭旨竭盡駑駘期無負高厚之

洪恩理合奏

謝並將奉到

硃批原摺恭繳謹

奏

能自策勵甚好然不在空言勉實行與朕看

同日又

奏為請

旨欽定稅差事竊照奉天府有徵收牛馬稅銀一差向例在於五部將軍衙門郎中以下主事以上統共較一本任俸深者補放現今收稅之

盛京員外郎常祿一年期滿例應更替今咨查各衙門選送俸深人員前來有連前任之俸算俸深者

且有出過稅差者又有呈稱凡出過稅差及拖欠各項錢糧者例不出差更有五部郎中聯名公呈請照京城小差之例在於每旗較論俸深者各派官一員入筒掣籤紛紛具呈爭端不已臣思牛馬稅銀每年約計四千餘兩以臣管見即使將本地俸深人員派收恐未必能稱厥職懇祈

皇上於京城部屬內揀選補放一員前來奉天徵收稅銀庶可杜隱匿拖欠之弊而各官亦無所用其紛

爭矣伏乞

皇上睿鑒施行謹

奏

所請甚是該部議奏

雍正六年正月初七日盛京戶部侍郎署理奉天
府府尹印務臣王朝恩謹

奏為奏明會審情形事上年十二月二十二日將軍

伊里布捧到

旨意命臣等四人審問根都札布等訛詐銀兩行止不
端臣恭繹之餘仰見

皇上明同日月無不照臨深為惶悚臣等即日傳喚會
審除金長保李存柱先已赴京未到外會審根都
札布不認需索赫楞格銀兩惟認供與金長保赫
楞格李存柱唱戲喫酒郭二家行頭原拏出來與
戲子看過兩次又在李存柱家唱戲我與金長保
到李家見戶部司官常有同著一箇司官不知姓

名在李家喫酒聽戲見我們一到他們走了等語
隨傳到常有問供我同本部司官程德赫楞格在
李存柱家喫飯一次是有的後見根都札布金長
保同佟九如等一羣人進來我們就走了並未聽
戲等語又喚到李存柱之弟李砥柱問那根都札
布金長保同一羣人到你家是何姓名尹泰即接
問李砥柱進學年分種種閒話並不問及一羣人
姓名云你去罷臣云既叫了李砥柱來如何不問

他一羣人是誰呢武格云何妨再問呢臣按根都
札布供出常有緣常有先曾管庫三年前見根都
札布到庫時出有不平之語遂成嫌怨其程德初
到

盛京因祖住李存柱房與之往來常有程德臣素知
其非妄為之人不與根都札布同類且在李存柱
家喫酒喫飯者豈止常有程德二人今根都札布
只供出常有程德而常有又供出一羣人進來如

任其妄供株連恐有屈抑若止以常有程德喫飯
坐罪亦未允服應聽公論議結臣欽奉

嚴旨敬謹會審時武格云根都札布是將軍衙門的官
赫楞格是戶部衙門的官他們行止不端有煩

聖念你們審問只要公當我就依了等語伊里布以手
掩面一語不發尚有畏懼羞愧之心尹泰設笑自
若反作坦然無事之狀同官皆所耳聞目覩除現
在據供會摺

奏請革職究審外合將現審情形據實奏

聞謹

奏

會審此案肯秉公與否要須爾等自為結案後孰是孰非有無瞻徇處豈能逃朕鑒悉耶至於其間之言語神情亦在所不論

雍正六年二月十一日盛京戶部侍郎署理奉天

府府尹印務臣王朝恩謹

奏為

皇恩錫福自天微臣感激無地謹繕摺恭

謝事本年正月二十七日臣齋摺家人捧到

御書福字臣跪迎懸掛如覲

天顏恭設香案望

闕九叩謝

恩訖伏思人生最難得者福是以書載五福詩稱多福

臣本薄福之人今蒙

皇上賜臣以福從此薄福轉厚不獨臣身膺

錫福之榮即舉家亦邀增福之慶謹什襲收藏歲歲恭
懸傳之子孫永為世寶長戴

聖恩於無極理合繕摺恭

謝謹

奏

據汝奏稱本來薄福是何言歟從來福緣善慶所以富
貴中淺福者有之貧賤中多福者有之人每自怨福薄

却忘薄福之由且福者非富貴貧賤之謂也但以富貴
貧賤論福乃屬無知之人轉薄為厚在汝自為朕何能
賜朕年年書福字與內外臣工者正欲警惕汝等自厚
其福之意若以朕能賜福會則悞矣

再所奏納糧一摺交該部議奏矣

雍正六年三月十二日盛京戶部侍郎署理奉天

府府尹印務臣王朝恩謹

奏為奏明首列銜名情由事竊照根都札布等行止

不端一案奉

旨交臣伊里布尹秦武格王朝恩會審其所審情節已
經另摺具奏外此係臣等四人公同會審之事及
至定稿伊里布不肯列名會奏尹秦因已降級不
肯首列銜名而武格又以應該戶部頭銜數日議
論不定若臣再為推諉勢必徒稽時日覆

旨遲延殊非公忠辦事之道是以臣首列銜名具奏合
將情由奏

聞謹

奏

銜名應如是開列何必多此一奏殊屬煩瀆

雍正六年七月二十一日盛京戶部侍郎署理奉
天府府尹印務臣王朝恩謹

奏為奉天借三之積弊已深剔除之立法宜早請

敕部定議以清倉糧事竊照倉糧存七借三每年春借
秋還誠為良法乃衿民借出之後秋收每有止完

額糧而不完借三者甚至有本戶應完之糧不肯全完出具借狀以本年之未完算作來春之新借者州縣官慮干奏銷考成聽從報完圖邀紀錄因而甘心捏報從前積弊相沿已久在衿民既知官已捏報便可任意抗欠官有事故離任在新官或初任未諳交代之時以為既有領狀不難催完可以接受殊不知歷久不完釀成虧空按其名則本年之借三究其實則歷年之捏欠及追比之時人

亡者有之失業者有之是倉糧借三之良法反開
官民欺飾之弊端奉天府屬各州縣處處皆然且
前任州縣授受多員歷年久遠因恃有借三之例
前後得以遮掩惟有暫停借三自然水落石出如
將現任官一槩叅追則衆官俱應離任倘不早為
立法清查則積弊愈深倉糧懸宕以臣愚見仰懇
聖恩俯念此項借欠不清與侵那虧空有間暫寬治罪
著令現任州縣官將現在借三民欠舊欠者若干

新借者若干其舊欠內係有徵者若干無著者若干據實造冊自首仍將各冊咨送戶部有著之借欠按其民欠之多寡州縣之大小酌量另行請

旨按限追完外其無著之項如現任官已經接受交代者革職留任其離任官現在交代者革職在原地地方均限一年追賠全完復職如限內不完以及現任官或有派累地方者叅處治罪著落家產變賠暫停借三之例請自下年為始俟查清舊欠之

後再行借三之法庶倉糧並無虛懸而積欠一清
自無淆混矣是否可行伏乞

皇上敕部議覆施行謹

奏

該部議奏

同日又

奏為請定紳衿欠糧奏銷另冊達部之例以杜隱蔽
以清

國賦事竊照錢糧為經國之要務紳衿乃百姓之觀
瞻各省額徵地丁錢糧每年奏銷未完稟稱民欠
紳衿亦混入其中查紳衿欠糧原按分數處分欠
有定例但照例處分案牘少見推求其故皆因混
入民欠之中是以未嘗顯著臣思紳宦已登仕版
子衿身列儒林凡戶下錢糧每年開徵當首先完
納以為民倡乃不肯早完待至奏銷尚有拖欠若
不分別造冊嚴定處分無以勸懲百姓臣愚以為

應令州縣官於每年奏銷時查有紳衿拖欠錢糧者不得混入民欠數內即將紳衿所欠糧銀數目無論多寡另造一冊開明一戶某鄉紳或某進士舉貢生監名下額徵地丁銀糧若干拖欠若干計未完幾分逐戶開出造冊詳報知府司院隨同奏銷冊達部聽部臣核議照原定紳衿抗糧之例分別革去頂帶衣衿仍按未完分數加倍治罪追完倘州縣官不行列冊詳報別有發覺照徇庇惡紳

例處分庶紳衿自無積欠併可杜詭寄包攬之弊
矣至於每年奏銷有實係小民拖欠者亦令州縣
官造冊呈送府司院存案仍令知府按照都圖出
示曉諭俾小民咸知欠數上司得以稽查如交代
後官亦得以接徵更可杜州縣官捏欠侵漁之弊
似有裨於催科

國賦之一法也如果臣言可採伏乞

皇上睿鑒敕部議覆施行謹

奏

九卿詹事科道議奏

雍正六年八月二十六日盛京戶部侍郎署理奉
天府府尹印務臣王朝恩謹

奏為奏請調缺以示勸懲事竊復州原係旗地因有
民人開墾地畝是以添設民官先經原任將軍噶
爾弼署府尹尹泰等議以錦州府通判移駐復州
今新選復州通判周槐到任受事以來見其詳報

事件每與城守尉抵牾即如詳報署印章京二格
自放海船出口周槐即請辭海防責任經臣批飭
嗣後海船出入照依江浙閩廣事例文武會查會
放併一面咨明將軍轉行城守尉一體遵行又如
復州城內荒地甚多該倅詳稱民人欲於城內蓋
房貿易臣亦咨明將軍轉行城守尉但地屬旗地
原該儘旗下駐劄之餘地然後給與民人而周槐
又以丈給皆係窪地并詳稱城守尉不容民人蓋

房縱兵拆牆嚷鬧又揭報城守尉五款請咨將軍會叅經臣批飭閱該倅所揭各款合之節次前詳

是必欲去此城守尉而後快於心非惟不知文武和衷之大體而併有不安其位欲圖規避遠缺之深心矣大為不合今臣若遽列彈章反得遂其規避之願若姑容其久任復州必致滋事臣查有金州新設巡檢王震原由蓋平縣典史題補為人老成歷練熟悉風土人情即如金州城內旗地丈給

民人蓋房貿易一事王震辦理妥當而城守尉並
無一言又上年委護通判印務凡遇審理事件處
置得宜據臣管見如以巡檢王震陞補復州通判
必能文武和衷調劑得宜其金州巡檢員缺即以
復州通判周槐降補倘能改其氣性三年無過仍
准以通判改補如此一陞以示勸一降以示懲則
各員均知鼓勵辦事地方必有裨益可否調補臣
不敢冒昧具

題理合繕摺

奏請伏乞

皇上睿鑒施行謹

奏

覽所奏甚屬可嘉已另旨諭部矣但必實出於公方免
物議若稍涉左袒旗人及瞻徇滿員情面而屈叅良倅
以取悅邀譽則大有未便後來被朕於他處訪知汝獲
罪不淺也

雍正六年十二月二十一日盛京戶部侍郎署理
奉天府府尹印務臣王朝恩謹

奏為請改奏銷限期以紓民力事竊照奉天奏銷定
例在於每年三月因上年丈地比舊冊丈出一倍
臣議定半銀半米徵收具題小民以部文未到延
挨觀望完納不前是以今年三月不能依期奏銷
臣題請展限十月荷蒙

聖恩俞允臣屢次出示曉諭勸勉催科仰賴

皇上洪福歲獲豐收是以雍正五年銀米新舊全完止

有錦縣鐵嶺復州三處尚有尾欠通計未完不及
一分已經拜疏奏銷但臣前題展限案內奉准部
文有嗣後奉天奏銷務照三月奏銷之例依限具
題等語今計至明年三月除扣年節封印日期計
於三箇月內欲完一年之銀米未免民力拮据勢
有不能即使民間今年完糧之外尚有蓄積當留
為來春耕作資本必待明年秋收方能完糧況丈

地之後民不加多而地實增廣臣從籌度民力起見仰祈

皇上洪恩嗣後奉天奏銷改定在於每年十月則民力得以年年寬紓輸將不致拮据永戴

皇仁於無既矣謹繕摺奏

聞如蒙

俞允臣另具題本請

旨施行謹

奏

奏銷改限之議是具疏題請可也

雍正七年二月二十六日盛京刑部侍郎署理奉

天府府尹印務臣王朝恩謹

奏為恭謝

天恩事伏念臣以菲材陋質蒙

皇上拔置戶部侍郎已屬逾分今於本月十二日准到

部文奉

旨調補刑部侍郎聞

命自天感激無地日內因兵部侍郎永福前往外城查
點盜甲臣現帶兵部印務俟永福回日將戶部兵
部印信交代又因西安巡撫武格奉

命之日將禮工二部印務交臣署理臣現在辦理五部
府尹衙門事務恭設香案望

闕叩頭謝

恩外理合繕摺恭謝

天恩謹

奏

從來能者多勞但慮無能莫辭勞瘁多為國家出力寧
非美事乎

雍正七年六月初四日盛京刑部侍郎署理奉天
府府尹印務臣王朝恩謹

奏為遵

旨酌議養廉事竊臣欽奉

諭旨各省有尚未分給養廉之員著各督撫悉心商酌

一面辦理一面奏聞欽此臣准到部文查奉天府府

尹府丞治中通判錦州府各衙門從前所有節禮
陋規久經革除今酌給養廉自應照各省事例出
諸耗羨查奉天承德等十州縣每年額徵地丁共
銀三萬四千五百九十二兩加一耗羨可得羨餘
銀三千四百五十九兩零內酌留一半以為州縣
公用及養廉之資其餘一半銀一千七百二十九

兩零擬派府尹衙門七百兩府丞衙門三百兩治
中衙門一百六十五兩通判衙門一百六十五兩
錦州府四百兩令各屬解赴承德縣貯庫分給各
官以充養廉之用再查府尹衙門臣先經奏明有
出邊車票一項除給各項人役飯食紙筆之費外
府尹可得五六百兩合之耗羨七百兩共有銀一
千二三百兩儘可為府尹衙門養廉之資理合奏

聞謹

奏

所奏知道了辦理頗屬妥協

同日又

奏為奏

聞事竊照賭博牌骰久經嚴禁而造賣之源尤宜杜絕
臣不時曉諭嚴查先據海城縣詳稱有山西太谷
縣民孫廷賓由海船販運紙牌二十三箱假稱錫
箔貨箱車拉上岸盤獲詳究等情臣隨批行查審

買自何處務究根源續據該縣詳審孫廷賓供出在於河南彰德府南關劉小吾等店舖買來臣查賭具久經禁止尚有愍不畏法之徒製造販賣若不嚴加懲創為害地方不淺臣若提拏製造之人往返甚遠是以封貯紙牌一面差役將孫廷賓押解河東總督究出製造舖戶劉小吾等并販賣之孫廷賓在於彼省照例治罪就近完結俟其移覆到日將紙牌燒燬以結斯案今准河南回文已將

孫廷賓發司收禁訖合將辦理緣由奏

聞謹

奏

押犯解交豫省就近結案以絕弊源甚屬可嘉

雍正七年七月初一日盛京刑部侍郎署理奉天
府府尹印務臣王朝恩謹

奏為特參御史掣肘部務以肅政體事竊臣查得巡

察

盛京御史赫德布凡註銷冊籍必要司官親身齎送不時傳喚司官當面回話以致各官奔走不遑更有提閱稿案越俎言事即如臣部於本年六月三十日准赫德布來文內開為咨取事貴部白旗司五月分註銷檔內有八兒呈報一主家人劉三自縊身死一案將說堂原稿相應送院以便稽查等因臣閱其文不勝駭異劉三自縊之案據八兒於五月二十六日在部呈報差官驗明自縊情實五

月分註銷冊內已造送赫德布查核訖迨提人審
理斷結例應於七月初五日以前造入註銷冊內
今未屆註銷之期突來提閱案稿是實何心且此
案當八兒呈報之初尚未審理赫德布預傳臣部
司官輝色當面吩咐云這件事情看你們如何審
法要仔細審纔好等語不知是何意見夫刑名案
件自有章程如辦理果有舛錯不公之處御史可
以風聞叅奏不應主張議論面囑司官提閱稿案

且凡遇詞訟事件從中指撥甚為掣肘又赫德布更有立異之處

盛京與

都京一體所以每遇朝期必齊集

殿前朔望祭

陵必齊集陪祀赫德布從不隨班上朝陪祀可謂不知紀綱法度者以上諸事臣目睹身受未敢緘默理合據實叅

奏伏乞

皇上睿鑒施行謹

奏

據王朝恩叅奏赫德布掣肘部務該部將赫德布撤回
嚴察議奏其員缺另行揀選御史派往

雍正八年二月初九日盛京刑部侍郎署理奉天
府府尹印務臣王朝恩謹

奏為請留縣令辦理地方事務事臣見上年十二月

分選單有中書一缺將奉天府海城縣知縣張士毅陞補查張士毅於雍正四年間到任臣自署理府尹以來見其詳報李文福販運鎗桿出海一案又有查拏孫廷賓紙牌一案可謂留心料理地方事務之員且目今欽奉

諭旨奉天地畝分別上中下三則起科正需熟諳民情之員悉心料理若該員陞授中書文到交盤離任則員缺又須委署亦乏兼理之員請將張士毅以

陞銜留任海城俾其供職辦事因部文未到臣不敢具本理合繕摺

奏請伏候

聖裁施行謹

奏

吏部議奏

雍正九年四月初六日刑部左侍郎臣王朝恩謹

奏為恭謝

天恩事本年四月初三日大學士公馬爾賽等寄字內
開督臣郝玉麟題叅皮應瑞在廣招搖生事一案
將字稿呈

覽奉

旨交與王朝恩務將皮應瑞拏獲解出倘王朝恩不能
拏住皮應瑞即將王朝恩革職解往廣東質審欽此
臣聞

命之下恐惶悚懼無地自容查皮應瑞於三月二十日

來到奉天是實臣不敢隱瞞嗣接大學士寄字遵
旨將皮應瑞咨送

盛京刑部嚴加肘鎖派撥官兵併差家人押解赴京
訖緣上年皮應瑞寄來條陳臣愚昧誤聽其言轉
達

天聽曾具摺將臣差人討取鹽商借欠及皮應瑞所寄
條陳種種情由據實陳奏並不敢懷私隱匿自蹈
欺罔今應瑞在廣招搖玷臣官聲臣罪難逭有干

革職之條荷蒙

皇上不即將臣罷斥

高厚之恩有同天地臣感激涕零愧汗浹背惟有痛自

刻責悔誤聽於既往期自新於將來以圖仰報

高深於萬一耳理合繕摺恭謝

天恩謹

奏

若無皮應瑞解交汝之身家性命難保不獲如何其可

所奏知道了

雍正十年三月初十日直隸河道總督臣王朝恩
協理北河事務臣徐湛恩謹

奏竊查河工修防每年有歲修搶修大修不等除大
修工程隨時另請錢糧外其歲搶二修預於霜降
後撥發預備銀兩備辦物料運貯工所一俟春融
即便興工於汛水前一律完整以資捍禦此定例
也前署河臣劉於義

奏請歲修工程於歲內

題估來年二月動工四月完竣所議允協大學士臣
朱軾以堤岸工程報冊後續有坍塌者必令隨時
報修又不在隔歲估報之限等語查此係搶修工
程隨時趨做所用錢糧應彙入搶修項下另案
奏銷無庸另行估計至於大修工程有石土埽工之
別劉於義

奏請大工不能速完者五六兩月停其工作朱軾覆

奏如係險要工程雖五六月亦未便停止等語臣等
詳審酌議如建砌石工創築堤工為經久之計者
工程浩大動輒經年應請於五六月農忙時暫停
工作若加幫土堤挑挖引河建築埽壩等項均係
緊要工程應亟於汛前趲完雖五六月亦未便停
其工作也是否允當伏乞

皇上睿鑒謹

奏

所議是應達部者咨部存案可也

雍正十年六月二十六日直隸河道總督臣王朝
恩協理北河事務臣徐湛恩謹

奏為奏

聞事竊照滹沱猪龍兩河今年伏水甚大幸皆隨漲隨
落自入秋後大雨時行水勢增長據河員呈報本
月二十二十一等日蠡縣猪龍河水漲出槽民堤
漫溢又據衡水縣報稱滹沱水發漫溢二丈又據

束鹿縣報稱滹沱水長無堤之處大水溢出又據
平山縣報稱滹沱水發漫溢過堤各等情前來除
飛檄上緊堵築并查水經何處有無損傷禾稼外
臣等查秋汛之水甚屬浩瀚目今永定南運水俱
長發臣王朝恩現在督率料理晝夜防護臣徐湛
恩飛赴蠡縣等處督同堵築漫溢之處務期剋日
完竣合將秋汛水長猪龍滹沱漫溢緣由恭摺奏

聞謹

奏

因不得人暫時勉強用汝乃汝毫不知勉勵遷改以冀
仰邀

天地神明鑒佑朕實代為憂之如欲講求感通之道惟以
忠誠公正自律方克有效非徒懷巧詐恃一己之聰明
歷練所能致者試自問自省寧有竟不覺知之理所奏
知道了

雍正十年七月二十六日直隸河道總督臣王朝

恩謹

奏為欽承

聖訓恭謝

天恩事竊臣謏陋庸材疊蒙

皇上高厚隆恩涓埃未効時切冰兢前以猪龍滹沱兩
河水漲以致蠡縣等處漫溢隨經繕摺奏

聞仰荷

皇上天恩不加嚴譴

特頒硃批諭旨諄諄訓誨勉勵成人臣跪讀之下感懼
交深惟有鏤心刻骨朝夕凜遵時存忠誠公正之
念對越

天地神明勉盡職守斷不敢一念稍弛一事稍懈以仰副
我

皇上教育洪恩於萬一耳臣臨奏曷勝感激惶悚之至
伏祈

睿鑒謹

奏

汝等漢軍輩之口頭言語何足為據須行出與朕看

雍正十一年二月初七日直隸河道總督臣王朝

恩協理北河事務臣徐湛恩謹

奏為奏請分隸隄工以重河防事竊查永定河南北
兩岸於康熙四十三年間設立同知二員分管南
北兩岸隄工嗣於雍正元年十月內奉

旨南岸同知全寶兼管北岸同知事務行走欽此欽遵

在案嗣經前督臣李紱

題請復設北岸同知因疏內未經陳明北岸必須專

員緣由是以部議未准臣等伏查永定河自蘆溝

橋以下兩岸環長四百餘里工段本屬綿亘以一

廳而兼兩岸之工程挨工查看數日方週若遇汛

水漲發上下全河俱係洶湧水猛溜急不能挽渡

汛險工長顧此失彼上年永定河汛水三次大漲

臣等目擊險要情形雖經飛飭道廳分投督率搶

護得保平穩但永定河道職任無轄調度查驗是其責成至於巡守保固辦料修防必須專責廳員以重職守且北岸現在添設重河重隄則巡防保守更需專員料理屢據永定河道定柱詳請復設前來臣等復查無異仰懇

皇上恩准復設北岸同知一員分岸管理實於工程有益擬合繕摺

奏請伏祈

皇上睿鑒謹

奏

具疏題請

雍正十一年三月二十一日直隸河道總督臣王
朝恩協理北河事務臣徐湛恩謹

奏為據情代奏事竊據署務關同知盧承琦詳稱承
琦係鑲黃旗漢軍有子盧烺現年十八歲例應歸
旗惟是承琦身係河員奔走修防凡做工購料等

事關係錢糧必得親信之人相助辦理承琦僅此一子別無幫助之人所有不能相離情節乞為據情代

奏等因前來臣等伏查盧承琦之子盧烺現隨伊父任所幫助辦事別無親信可託之人擬合據情代奏請

旨臣等竊思河員專司河務與地方官職任刑名錢穀者不同一應辦料修工均關帑項必須往來河干

詳加稽查務得親信子弟相助料理方免貽誤臣等愚見如係河屬旗員子弟有成立者准其酌留一人隨任助伊父兄辦理事務既可資其臂指兼以學習修防實於河工有裨合并

奏請伏乞

皇上睿鑒謹

奏

盧承琦之子准留同知任所咨明該旗可也

雍正十一年六月二十七日直隸河道總督臣王
朝恩協理北河事務臣徐湛恩謹

奏為奏明伏汛水勢情形事竊查本年入伏以來自
六月初八日至今陰雨連綿惟十七十八二十二
二十三等日雨勢更大晝夜不止聞山東地方自
六月初一日起接連大雨臣等查諸河之水惟漳
河滏河南運北運四河水勢漲發甚至一日之內
陡長至一丈有餘者其漳河所長之水挾衛汶兩

河之巨流盡歸於南運兼之風雨交加南運河內
無隄之處在在出槽有隄之處平溢隄頂滄州之
東岸大王廟前縷隄其水高出隄頂數尺漾開溢
出幸水有歸宿直由南窪入海俟水退查明另叅
疎防外至北運水勢甚驟亦有平隄之處其無隄
處所亦皆出槽幸有青龍灣筐兒港兩處減壩可
以宣洩臣等輪流上下督率搶護其險要各工亦
俱選派人員無分雨夜時刻巡防務期保護無虞

現在南北兩運河內空重糧艘往來遙行無阻而
永定滹沱猪龍三河水汛亦皆小於上年臣等因
雨大水漲恐厪

宸衷謹將伏汛水勢情形繕摺具

奏仰慰

聖懷謹

奏

朕慮汝之居心立行未能仰邀

神佑時以河漕運道念切於懷總俟秋汛過後方敢言無
虞二字也

硃批諭旨卷一百四十

欽定四庫全書薈要卷八千八十一

史部

硃批諭旨卷一百四十一

硃批慶元奏摺

額外御史監督淮安關稅務臣慶元謹

奏為據實陳明仰祈

天鑒事竊臣蒙

皇上天恩特命管理淮安關務加銜久任兩次

陞辭蒙

寵賜上珍兼

賞盤費

聖恩稠疊萬難圖報惟有潔已奉公通商裕課庶幾少
副

皇上任使至意聞淮關連年虧缺經管河漕諸臣節次
推諉訪求其故則知淮關徵稅以豆麥棗棉等件
為重皆自北至南如北省大熟販運接踵九十月
間日收之數比常數倍一年之計惟此是賴是以

前任河臣趙世顯加額歸併初年徵足之外尚有
贏餘其後北省連歲歉收商販已少而關口搜索
特嚴商旅畏避從間道繞越比年額課益虧職此
之故臣自到任後恪遵

聖諭革去冊書勤加查驗放行招徠商旅節省浮費斷
不敢少事奢靡及為分毫私蓄之計冀於正賦不
無少補惟是東豫兩省屬久荒之後今歲雖稱有
秋而民間元氣初復販運者少是以北貨甚稀又

聞蘇常等處河路淤淺舟楫難行南販亦復寥寥

臣於八月間到淮迄今已逾四旬實止收銀二萬

五千餘兩當秋成之後情形若此將來河凍冰合

何須

如此憂慮淮關係朕深知之事爾為朕所深知之

人但

商旅自必益稀是以夙夜憂慮忘廢寢食輾轉思

維莫知所措惟仰賴

北年歲豐歉朕自然得知朕之

耳目

頗廣爾所素悉稅課之或多或寡即偶至缺額不

妨將

緣由具奏朕自能鑒察

皇上福德昭臨阜成有象即今淮屬米價甚平又於九

月二十二日得雨遠近霑足二麥已及時播種從

此歲歲豐收臣益加謹愆庶不負

高厚生成之德耳再臣奏摺理應手繕緣自向年病後
原非機密事件代寫何妨如遇應密之奏亦不必拘定
楷書筆畫隨意大小俱無關礙也
之人代為繕寫合并陳明伏乞

聖慈鑒原謹

奏

知道了

額外御史監督淮安關稅務臣慶元謹

奏為遵

旨查覆事竊臣奉

聖諭查趙世顯帶管淮關侵蝕隱瞞實數臣於到任後
向節年經管書吏追取徵收底冊核算按冊開趙
世顯自康熙五十八年六月兼管起至六十年六
月止共徵收銀一百一十七萬八千九百八十四
兩八錢零共解過正浮羨餘銀七十六萬五千三
百九兩四錢零共餘銀四十一萬三千六百七十
五兩三錢零自六十年六月起至六十一年正月

離任止共八箇月二十二日應徵額銀二十五萬
五千五百八十三兩六錢零按冊收過銀二十二
萬三千七百九十九兩五錢零實缺額銀三萬一
千七百八十四兩零內實解過銀八萬二千五百
九十兩六錢零查有批迴可據其餘那移未解之
項已屬侵蝕現經部議將趙世顯第三年所欠銀
兩著落追賠并管關同知分賠之處容另疏具覆
外今臣據冊查出前兩年隱瞞銀四十一萬三千

六百七十五兩三錢零趙世顯身為大臣其歸併稅務又係自行

題請所有贏餘理應悉輸公帑方不負任用之意乃於多徵者恣意隱瞞於缺額者又不將餘銀賠補罔利負

恩莫此為甚臣奉

旨查察不敢一毫徇隱所有據底冊查出之數相應據

實奏

聞謹

奏

此事爾會同查弼納察議具奏

額外御史監督淮安關稅務臣慶元謹

奏為恭繳

御批并報初季徵解實數事竊臣前奏查覆趙世顯隱
瞞關稅一摺奉

御批此事會同查弼納察議具奏欽此已移咨督臣酌

議另覆所有奉到

御批原摺理合恭繳至

臣到任迄今十一月十八日為

一季按額扣算應徵額銀八萬八千一百二十一
兩零今實徵正浮耗銀七萬四千五百六十兩零
實缺銀一萬三千五百六十兩零此缺額之內尚
有折夫銀一千二百餘兩應州縣分徵彙解臣現
在嚴檄催徵至於季發關役工食日用等項向於
此內支給臣念公賦未充何敢遽恤其私百凡務

從撙節未敢擅用分毫今分別款項盡行解發訖
臣思課額之盈虧固視年歲之豐耗而裕課之道
惟在通商因前河臣帶管以來需索過甚致商人
漸漸畏避臣受事之後惟於勢豪無所假借雖供
運

御用船隻亦未敢聽其夾帶貨物此外肩挑零販從寬
弛貸客商輸鈔並無苛索臣不時潛行察訪巡瞭
人役遇有勒索立即責治仍出示曉諭冀使商旅

卷一百四十一
爭赴而板閘一關與宿遷揚州由閘相望六百里
間尤賴同心共濟若一關稍苛則三關皆受其累
目今三處俱隸督撫其遴委管理之員諒能顧惜
官箴宣揚

皇上恤商便民之德意臣疊蒙

聖訓惟益加勉勵以圖後效耳謹

奏

勉圖後效之見甚好但盡心料理朕自能鑒照勿慮朕

不汝信也

額外御史監督淮安關稅務臣慶元謹

奏為奏

聞事竊惟漕艘回空關係新運向來途次稽滯司漕諸臣雖加意催趲而尾後數幫不免於八閘守候直俟東風凍解方得南行今年河道通流船隻陸續抵關臣不分晝夜立時驗放已於十二月十七日盡行過關訖臣因事關漕務恐上廛

聖懷合行奏

聞謹

奏

覽奏漕船盡數過關深為慰悅

額外御史監督淮安關稅務臣慶元等謹

奏為遵

旨議覆仰候

睿裁事該臣等奉

旨會同查議前任河臣趙世顯隱瞞關稅一案臣等議

得趙世顯兼管淮關二年八箇月零二十二日覆

查日收底冊前二年內除解過額課浮羨贏餘銀

兩外共餘銀四十一萬三千六百七十五兩三錢

零第三年八箇月零二十二日額該徵銀二十五

萬五千五百八十三兩六錢零實徵過正浮耗銀

二十二萬三千七百九十九兩五錢零止缺額銀

三萬一千七百八十四兩零據趙世顯在部供稱

缺額銀九萬九千六百九十七兩七錢零內係捏
報缺額六萬七千九百一十三兩六錢零查此項
捏報缺額銀兩與伊那移銀兩共十八萬八千六
百四兩零現在部議著落趙世顯家產并伊子孫
勒限嚴追在案其前兩年所隱瞞之餘銀四十一
萬三千六百七十餘兩不據實報解情殊可惡臣
等遵

旨會查按冊細核絲毫無枉不能為趙世顯寬也再查

趙世顯准關費用總計三年內各院司道地方官

交際規禮并解餉解冊使費盤費及解船政廳加
平色銀心紅紙劄各口岸及衙門書役工食又犒
賞催漕防汛兵目捐給孤貧設立義學墊解各州
縣折夫關署各廟每月牙祭行香添換執事銀鞘
橋船各費以上共銀十三萬四千一百二十五兩
即在四十一萬餘兩之中用去尚該餘銀二十七
萬九千五百五十兩三錢零臣等竊思趙世顯身

為大臣理應革除陋弊諸凡節省而倍加侈靡負
恩已極雖云淮關相沿舊例即或有可原情之處臣等
絕不能代為開除其多收銀兩應請

敕部嚴追充餉或得於相沿常費之內量

賜寬典出自

聖恩非臣等所敢擅便者也合先具摺奏

聞應否另具

題疏伏乞

皇上御批施行謹

奏

其用去之十三萬餘兩既係相沿常費將此項開除具
本題奏

額外御史監督淮安關稅務臣慶元謹

奏為恭報次季徵解實數事竊臣仰荷

天恩委司關務其第一季徵解缺額情由業經具摺并
另疏奏

聞訖今自上年十一月十九日起至本年二月十八日
止又滿第二季按額扣算應徵銀八萬八千一
百二十一兩零今實徵過正浮耗銀共六萬三千
九百五十一兩零併各州縣未經完解折夫銀兩
共缺額銀二萬四千一百七十兩有奇已分別款
項解發訖臣訪聞淮關舊例每當九十月十一月
之交時屆秋成商販湊集賦稅充盈恒倍他季惟
十二月至正月漕艘擁擠兼遇河凍冰合商販稀

少稅額倍虧向來監督每將前數月之有餘以補後數月之不足尚有贏餘乃臣受事之始正值秋成之候偶因鄰省薄收稅竟缺額第二季雖當歷來缺額之時商販往來第畧減於初季而稅額不至大虧惟目下南北貨船俱因河水淺阻未得通行所以商販甚稀前二月二十一淮屬地方甘霖大沛入土五寸有餘又於本月初一日夜雨達旦比前入土尤深且聞大江南北俱於二月中旬以

來遠近得雨二麥淳興豐登已兆即今河水漸增
將見漕濟商通年豐貨集臣仰體

皇上寬商恤民之大德竭力招徠多方撙節庶幾稅充
課裕將贏補絀或不負

皇上格外栽培之至意耳除恭疏

題報外理合具摺奏

聞謹

奏

知道了此番時雨七省同日普霑乃從來春季難遇之事朕不勝欣幸至於稅務爾放心料理諒爾斷不欺隱於朕也縱少有欠缺朕自然原恕何必為此憂慮況各關累年以來增添似覺過多朕為此正在留意

額外御史監督淮安關稅務臣慶元謹

奏為恭請叩覲

天顏仰祈

聖鑒事竊臣自雍正元年七月二十六日

陞辭赴任以來已經半載有餘依戀愚誠至忘寢食且
關權情形猶有非摺奏所能盡達者若得叩覲

天顏跪領

聖訓臣幸有所遵循庶免將來隕越況目下三四月間
漕船擁擠商船稀少臣乘此權務稍閒之時星馳
赴

京往返亦不過四十餘日其關梁啓閉錢糧收納謹
委的當家人付臣私押鈐記小心料理仍飭淮安

稅課司員每日臨關查驗自當無誤仰祈

皇上俯鑒微忱使臣得遂犬馬戀

主之誠臣不勝踴躍感戴之至為此謹

奏

明歲來京可也爾甫到任受事未幾地方情形并關稅事宜尚未必周詳備悉於次年來為是

額外御史監督淮安關稅務臣慶元謹

奏為季報徵解實數并恭繳

御批事竊臣自本年二月十九日起至閏四月十八日

止滿第三季按額扣算該徵額銀八萬八千一百

二十一兩零今實徵過正浮耗銀共八萬一千四

百八十兩零併各州縣未經完解折夫銀兩共缺

額銀六千六百四十兩零臣合算第三季共收銀二

十一萬九千九百九十一兩零除第三季正額外

共缺加添浮羨銀四萬四千三百七十二兩零除

另疏

題報外合行具摺奏

聞臣查今年春雨應期淮屬二麥豐登聞東豫兩省亦較近歲倍獲收成且大江南北於閏四月十五六兩日遠近得雨又聞寶應縣以南常州府以北近生蝗蝻地方官現在撲捕幸二麥已收禾苗未長諒不至為災若再得大雨則蝗種可以盡除矣再各省重運俱於閏四月初六日盡行過關訖又太常寺少卿臣于廣奉

旨_在湖廣採米十萬餘石於前四月二十九日悉已過

關_臣職司驗放相應附

奏所有從前奉到

御批奏摺一併恭繳謹

奏

覽奏深慰朕懷今歲麥收光景及現今雨水情形天下大概相同朕惟以手加額感

天地之垂佑并

聖祖在天之靈之慈蔭耳慶喜之衷非可言喻

額外御史監督淮安關稅務臣慶元謹

奏為仰體

皇仁宣揚

聖德事竊雍正二年閏四月二十一日接到部劄內開
欽奉

恩詔酌議事理將各鈔關加添贏餘銀兩盡行裁去每
年應徵額稅銀兩自河臣趙世顯管關任內加增

浮費羨餘銀十五萬兩并贏餘銀三萬兩俱為定例遂將日收印冊之內於正項外另加浮費名色以充正供且又加浮費之耗所以稅額滋繁商民滋累今蒙

皇上湛恩汪濊澤及梯航

特命將各關加添贏餘銀兩盡行裁去臣欽承恩命仰體

皇上愛商恤民至意隨即恪遵

諭旨於本月二十二日遍示通衢曉諭商民自本日為
始將前河臣所加浮費一項并浮費之耗盡行革
除并鈔粘部劄宣揚

聖德遠近商民無不踴躍歡忭謳吟感激除另疏恭謝
天恩外所有遵

旨減除浮費浮耗情由理合具摺奏

聞謹

奏

覽奏知道了此事應如是施行

額外御史監督淮安關稅務臣慶元謹

奏為牙稅之盈缺不齊折夫之捐賠有例謹請永遠

代輸以濟工需以甦窮戶事竊臣查清江廠項下

折夫錢糧歲額五千五百兩有奇訪係明季時客商

南北往來俱於高家堰過壩凡車船驛馬等牙行

列聚堰旁每歲捐貲募夫助修堰堤名曰折夫後

壩開道通牙行星散錢糧無著因散派淮屬城鄉

鎮集零星牙僧輸納此項錢糧由淮關徵解河庫
遂為成例但牙行開閉無定非地丁錢糧可比其
間逃亡者有勾補頂充之擾現存者有抑勒分賠
之累自前河臣靳輔以河銀關係歲修急需等事
題明准部議覆嗣後將該司應解河道項下錢糧務
於額徵別項稅銀內照額解足不得缺欠等因遵
奉在案從此折夫錢糧稍有欠缺歷任監督俱將
別項溢收銀兩墊解後於康熙三十七年前河臣

董訥咨部歸併地方官徵解三十八年及四十一
二兩年監督馬爾漢查林布納言三任內山陽縣
共欠解折夫銀六千一百二十兩零

題作民欠歷任帶徵毫釐未完至四十六年部議將
督催各官照例處分仍無完解五十年監督窪哈
理咨准將前三任欠項分作十年監督代賠方得
完結臣自到任後歷查此項墊補情由不但相沿
已久且實無戶可徵因恐有誤工需除各州縣衛

所解到現存牙稅銀共一千七百五十二兩有零
外其餘循例照額完解伏查折夫一項內有清江
浦無名牙儉銀六百一兩零向屬監督墊解外海
州清河縣安東縣宿遷縣大河衛鹽引所等處共
額銀一百一十四兩零歷年無缺山陽縣歷年報
缺逃亡銀二千六百五十二兩零止解銀一千六
百三十八兩零是原額五千五兩有奇而歷任之
墊賠至三千二百五十餘兩其現解之一千七百

五十餘兩凡州縣衛所之徵比已經六七衙門而城鄉鎮集之追呼何止百千窮戶在當年稅額浩繁之時其三千二百餘兩尚且歷任墊賠以濟工需況今

恩免贏餘之後此一千七百餘兩何難一併補苴以甦窮戶伏乞

皇上俯准臣請自雍正二年八月為始將前項折夫原額五千五兩零每年盡歸淮關墊解不得缺欠致

誤工需其各州縣衛所歲徵散行牙僧折夫錢糧
盡行蠲免並請

敕諭督撫會同微臣通行淮屬勒石曉諭嚴禁重徵永
遠欽遵則河工不致遲誤於歲修而窮牙均沾
聖澤於萬世矣為此具摺奏

聞應否另具

題疏伏候

皇上批示施行謹

奏

大凡錢糧減之蠲之最易增之則難逋欠之項雖百萬數十萬俱可豁免額徵之項即數千數百亦輕易裁汰不得近日朕雖特免各關加添贏餘仍令各監督將贏餘據實奏報不過寬其缺額之處分耳今據奏請將折夫一項錢糧永遠代輸諒贏餘之外無可墊解殊未思贏餘即係公中錢糧也當日窪哈理之咨准代賠亦如殷達禮之題請長蘆二萬兩帶銷相仿外觀雖似公當

其實巧取私利爾此舉固屬善政但恐後來監督未免
借為口實朕意若果欲行此一事何必令監督代輸竟
不如增入該關正項額徵則錢糧既不虧數而正額加
之有名將來監督亦無可借口如此還可若照所奏將
歷來額徵裁去而令監督以贏餘賠補是將正項錢糧
化作虛徵將公項羨餘算作監督效力於錢糧毫無益
處反暗中銷為烏有矣反覆看來折夫一項應增入淮
關正額為是具題聽候部議可也

額外御史監督淮安關稅務臣慶元謹

奏為仰遵

聖訓再行奏明事本年九月初九日奉到

御批臣所奏折夫錢糧摺子伏蒙

皇上教誨諄切周詳臣跪讀之下不勝感戴伏查折夫
一項原係淮關正額錢糧向因有司歷報缺額三
千二百五十餘兩歷任監督恐誤

奏銷每將羨餘暗中補墊冀免叅罰但羨餘之多寡

均應報解若暗中墊去是折夫之額雖充而羨餘已不盡屬報解之項矣更有巧為脫卸之計開作民欠則折夫明虧正額而羨餘暗飽私橐且以經徵不力委罪有司又以督催處分卸罪後任遞相推卸錢糧終無歸著此當年窪哈理所以有十年均賠之議也至撫臣吳存禮管關時所有折夫原額五千五兩之數已經盡免徵解臣思正供錢糧未便私免仍令各州縣開徵一年之內止解銀一

千七百五十餘兩其三千二百五十餘兩據報實
係歷來缺額無戶可徵所以臣請將缺額之三千
二百五十餘兩明使監督照額完解則正額之數
依然不虧羨餘之銀可歸

公帑而蠲免之實亦彰明較著矣但臣識見淺陋以
為缺額之三千二百五十餘兩既屬監督墊補則
現徵之一千七百五十餘兩似不必更令有司徵
解致滋煩擾故懇請一併蠲免總歸正額完解使

奏銷得以畫一今奉

聖訓誠千古不易之名言實非愚臣所能見及惟是臣

荷

皇上格外寵遇若有羨餘不據實

奏明則欺

天之罪又何能追即暗行墊補不行

奏明亦為欺隱上負

洪恩令臣仍將舊缺之三千二百五十餘兩循例完解

至其餘一千七百五十餘兩現有著落臣仰體

聖意知逋欠之項雖多可免額徵之項雖少難蠲今現有之項自不容裁仍令地方官照數徵解如是則折夫之名仍然不廢而正額既不致有缺羨餘亦不致暗虧臣幸得追欺隱之罪矣為此繕摺覆奏并請

天恩免臣另具

題疏致煩部議伏祈

皇上批示施行謹

奏

此事爾讀朕諭究未透徹來京面朕再定可也爾當於十一月之十五前後起程赴京陛見印務可交與知府祖秉圭暫行管理

額外御史監督淮安關稅務臣慶元謹

奏為叩謝

天恩事竊臣於上年十二月初八日跪請

聖安伏承

天顏和藹

聖訓周詳臣仰瞻之下懽忭靡涯復蒙

恩賞稠疊有加無已感戴私衷鏤心刻骨臣自正月初

三日

陞辭初四日就道於十九日已抵關署業經恭疏奏

謝所有欽奉

聖諭應行事件臣現在次第遵行另疏奏

聞臣自出京南行沿途地方俱仰賴

皇上福德照臨比年豐稔去冬雨雪應期即今正月十七日經過郟城宿遷又俱得雨雪足二麥青蔥大有預慶合併奏

聞謹

奏

都畿一帶雨雪亦甚透足誠可為稱慶者

額外御史監督淮安關稅務臣慶元謹

奏為恭報次季錢糧徵解實數事竊臣蒙

皇上天恩命管理淮關其第二年第一季徵解實數并
贏餘銀兩俱經

奏明在案臣自雍正二年十月十九日至十一月二
十一日計管稅務一箇月零三日即遵

旨起程

陞見將印務暫交淮安府知府祖秉圭管理祖秉圭自
十一月二十二日接管起至雍正三年正月十八

日卸事止計一箇月零二十七日合臣前所管一箇月零三日已滿第二季查臣前管之一箇月零三日共收過正耗銀十一萬三千二百三十兩零內除應解作正額并儘收儘解等項共銀一萬八千五百七十三兩有零外實餘銀九萬四千六百五十七兩零連前第一季共餘銀十六萬三百五十六兩零亦經

奏明在案知府祖秉圭接管一箇月零二十七日共

收過正耗銀四萬九千九百四十四兩零內除應
解作正額并儘收儘解等項共銀三萬二千一百
五十四兩有零外實餘銀一萬七千七百九十兩
零合臣所餘之數共餘銀十七萬八千一百四十
六兩零俱存貯在庫俟年滿彙解

題報相應據實奏

知道了
聞再淮安地方於正月二十三、四兩日遠近大雨不但

田疇霑足即河道亦俱寬深合併附

奏

都中於正月內亦得透足雨雪洵為可喜之至

光祿寺少卿監督淮安關稅務臣慶元謹

奏為恭報第三季錢糧徵解實數事臣自雍正三年

正月十九日回任之日起至四月十八日止已滿

第三季按額扣算計該額銀五萬二百九十五兩
九錢零又儘收儘解銀四百九十二兩三錢零共
該銀五萬七百八十八兩二錢零令實徵收正稅

火耗銀共十五萬四千八百七十二兩六錢零除
分別款項照額解給外尚餘銀十萬四千八十四
兩四錢零合前兩季共餘銀二十八萬二千二百
三十兩四錢零俱封貯在庫俟年滿彙解相應據
實奏

真堪慶幸

聞再臣聞大江南北自春入夏時雨應期高下霑足即
令淮安地方亦俱雨暘時若又各省糧船陸續過
關者已五千二百三十七隻惟湖南尚有雨幫未

今已到矣
經到准合行一併奏

聞謹

奏

聞爾待人過嚴在爾雖係秉公在人未免怨憾不知爾亦曾有所聞否

光祿寺少卿監督淮安關稅務臣慶元謹

奏為恭謝

天恩事臣齋摺人回奉到

皇上恩賜辟暑金丹一匣臣恭設香案叩頭謝

恩祇受訖伏奉

御批訓臣以待人過嚴致人怨憾臣跪讀之下反覆循
省感激涕零伏念臣一介庸愚荷蒙

天恩委司樞務自任事以來夙夜兢兢務期商通課裕
藉報

隆恩於萬一惟是淮關地當孔道稍不如意則易於滋
怨久在

皇上洞鑒之中茲蒙

聖諭不啻耳提面命使臣得以朝夕警覺庶不負

皇上訓誨至意第恐任事日久或致滋怨日深統祈

皇上曲賜憐憫終始矜全則臣生生世世感戴

聖主生成之大德於靡涯矣為此具摺恭謝

天恩謹

奏

知道了終始矜全四字不但於爾云然即凡一切人朕

無不如此存心相待但須爾等亦自能保全始終方好
譬如隆科多係朕不始終矜全之耶是伊自不保全始
終耶再如曲賜憐憫一語更為非理之談豈有一味徇
私之天子乎總要爾等為人臣者恪秉公誠勿見小而
失大以自貽伊戚假若已原無過橫被誣枉朕可保其
斷然不妨倘自為不善而欲仗朕曲賜憐憫以終始終
全之慎莫虛作此想萬萬不能也

光祿寺少卿監督淮安關稅務臣慶元謹

奏為恭謝

聖訓并瀝陳下情事本年七月二十二日接奉

御批伏蒙

皇上訓誨臣跪讀之下慚悚無地臣蒙

皇上天恩至深至重苟有人心皆當知感臣非草木寧

不自勵伏念臣前摺所陳實因錢糧重地不敢久

處奉

命三年今經兩載所收稅額已可約計乘此可以上邀

天恩使臣入覲

天顏朝夕侍從一以免將來之隕越一以不負

皇上委用之隆恩乃下情惶恐詞不達意冒昧之罪復何容追念蒙

聖訓惟有銘心鏤骨服膺遵守以期勉盡職業何敢更萌私念上負

皇恩自干罪戾臣謹瀝陳下情仰祈

天鑒倘蒙

皇上俯念愚誠

賜臣入覲俾得親聆

聖訓臣不勝感激惶悚之至謹

奏

惟以秉心奉公所行得中為要即日在朕之左右亦不
過以此二語訓諭耳勉為之

光祿寺少卿監督淮安關稅務臣慶元謹

奏為恭報第二季徵解實數事竊臣蒙

皇上天恩委司淮關第三年分內第一季徵解實數業經

奏明在案今自雍正三年十月十九日起至四年正月十八日止已滿第二季共徵收過正耗銀八萬九千七百一十六兩二錢零內除一季額銀五萬二百九十五兩九錢零併儘收儘解銀三百八十二兩三錢零俱分別款項照額解給外尚餘銀三萬九千三十七兩五錢零合前一季餘銀之數共

餘銀九萬五千四百四十三兩四錢零臣俱封貯庫內俟一年期滿彙解除恭疏

題報外理合據實奏

聞再淮屬地方於正月十二三四五六連日瑞雪應期二麥已屬有望豐登之兆於此可見現今漕船擁擠所以商販寥寥將來河路漸寬運販自當接踵而至臣仰賴

皇上福庇倘得稅充課裕則瓜期在邇庶免有所隕越

或不負


皇上格外栽培之至意謹

奏



知道了謹慎和平為之百凡處不可自恃更勿縱性

硃批諭旨卷一百四十一



總校官庶吉士臣侍朝

校對官編修臣莫瞻菴

謄錄監生臣王淦